



Weihnacht 2009

8. Dezember 2009

*Wos i mir wünschen daat*

*Wos i mir wünschen daat  
is Weihnachten schee staad!*

*Zwetschgn-Mannederln und Gletzenbroud  
dee sand heut längst scho mäuserltoud.*

*Wos dee Leut heut ois fressen doan!  
da moanst grad, dees sand lauter Noarn.*

*Wos i mir wünschen daat  
is Weihnachten schee staad!*

*Am Kopf dee roud Zipfelhaubm  
dees war ja no nia mei Traum.*


*Und Lebkuachan im August  
is für mi wirklich da Frust.*

*Wos i mir wünschen daat  
is Weihnachten schie staad!*

*Für dee Kinder a Kripperlgspui  
is ja nirgends mehr s 'grouße Zui.  
Oiss, wos heut no zejt  
dees is grad dees scheiß Gejd.*

*Wos i mir wünschen daat  
is Weihnachten schie staad!*

*Jedm Deppen dem sollst wos schenga,  
was sollst dir denn da no denga?  
Oiss ramscht grad no zwengs am Konsum,  
ja, sand ma denn alle so dumm?*



*Wos i mir wünschen daat  
is Weihnachten schie staad!*

*D 'Mam möchert in d 'Schönheitsfarm,  
da Pap ' möcht a Tuss am Arm,  
da Bua wui a Musig 'schroa,  
und 's Butzerl schreit ganz alloa.*

*Wos i mir wünschen daat  
is Weihnachten schie staad!*

*D 'Manner feiern lustvoll Apfent,  
dort wo sie ganz gwiß koaner kennt.  
Und bei jedm Scheißverein  
muaß a Tombola sein.*

*Wos i mir wünschen daat  
is Weihnachten schie staad!*

*Dees bleede Gschroa im Radio drinn  
nervt mi a so, i moan i spinn.  
Und wos dee im Fernseher zoagn  
is ja grad no da reinste Schmoagn.*

*Wos i mir wünschen daat  
is Weihnachten schie staad!*

*D' Buam schlag an Nikolaus,  
und gschenkt wollns a Weihnachtsmaus.  
D' Leut saufan, was grad no geht,  
dees is doch koa Weihnacht ned!*

*Wos i mir wünschen daat  
is Weihnachten schie staad!*

*Dass andre Leut hungern und friern,  
dees geht heut glei koan mehr an d' Niern,  
und dees mit Afghanistan,  
rührt scho goar koan mehr an.*



*Wos i mir wünschen daat  
is Weihnachten schie staad!*

*A wengerl glaubm in der Metten,  
dann mitanand nei in d 'Betten —  
z 'sammschmuggln und artig sei  
dees foit ja heut koan mehr ein!*

*Ois, wos i mir wünschen daat  
Dees is Weihnachten - schie staad!  
Weil ruhig und liab zum sei,  
wo findst denn so was no glei!*

